



QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORUM,

Die Jovis 11. Januarij.

M. CLAUDIO BERGER

DOCTORE MEDICO, PRÆSIDE.

*An calidiori impeditoque corpori non metallica, sed
simplex aqua?*

I.

STAT vita, membrisque omnibus habilis vigor, suavissimi caloris mediocritate, humidique primi genij ubertate: fugit tum illius excessu, tum hujus diminutione, quam paulatim affert defluens ætas. Præceps verò fit utriusque lapsus, iis inconsideratè adhibitis, quæ calefaciunt excitantque impenitus, falsis, acribus escis, vino potissimum generoso, motu nimio, cælo non æquo, æstuoso, curis, vigiliis, dissolutis moribus, exundante lasciviâ, & quæ hujus mater est, desidia; magis adhuc medicamentis, quod à nostrâ temperie longius recesserint, hoc nocentioribus, nec mediocriter febribus, morbis aliis vehementibus, diuturnis, exolefcit: eo subducto ut vitæ, sic artis fundamento firmi-

2

fimo, tota ruit sanitatis ac bene medendi ratio. Planè mol-
litiam, dulcisque succi affluentiam naturæ in deliciis esse:
inde viventibus omnibus vires, delicatum sanguinem suffi-
ci, nitorem, decus, lætumque honorem affari adeò per-
spicua res est; ut ad eam hebescat nemo, nisi qui suffocato
rationis lumine, consulto seipsum obstupefecit.

II.

AT quemadmodum moderatus viscerum calor, à quo
integer sanguis prima est salutis causa; ita qui super-
bior modum non tenet, penè cunctorum quibus premimur
morborum parens est; maximè ubi insincero sanguini, præ-
cipuæ caloris sedi imisque medullis implicatur. In illam
enim quâ tantoperè scholæ perstrepunt obstructionem,
quam & ægrotationum procreatricem, aut nutriculam per-
hibent, iniquè transcribitur vitium uni calori imputandum.
Quo nempe modo ubi infessu, potuæ infusa per totum
corpus aqua descendit altissimè, soluta quæ calore tume-
bat pervicax illuvies, in se ipsa residit, restinctoque incen-
dio, vel sponte suâ effluit, vel faciliè sequitur, ducens me-
dicamentum: sic quoties sopitus suscitatur ignis, laxatas
primulum venas denuò claudit aut malignè angustat, latè
velut obducto limo, si quis tum subest, inextricabili, relu-
cante, nec ampliùs emovendo.

III.

AQUAS omnes simul atque concretorum calore me-
tallorum, per quæ decurrunt vires, hausere, calore
quoque insignes & duras evadere, autor est primus artis an-
tistes, numinis quasi dono mortalibus commendatus, &
aiunt quotquot ab eo fuere excellentissimi Medici. Nec,
dum suis utatur modulis ratio, dubia res est, quin apertè
sensibus sibi fidem confirmat. Quippe instar lixivie per ci-
nerem, calcemque metallorum percolatæ, quem clancu-
lum induere calorem, epotæ, corpori universo impertiunt;
quodque damnorum caput est, siccitate nullâ arte emen-
dandâ præditæ, insitum humorem exedunt, capitis dolo-
rem, tabem, sterilitatem, icterum, colicos dolores, multi-
plicisque generis febres adducunt, alvi demùm vesicæque

colluvionem demorantur, non metallicorum ramentorum congerie, sed eo quem à metallis acceperè spiritu, nobis, imò viventibus rebusque omnibus inimicissimo. An ob eam rem aquas istas ne quidem primoribus labris ulla unquam gustavit quadrupes? Viden ut quas illæ attingunt surgentes herbas elidunt, enecant; ut vel ipsum rubigine ferrum lædunt?

IV.

A Juvandâ vitâ non parum absunt qui metallicas aquas stupore vulgi propè jam celebres (quibus tamen doctrinis instructiores veteres, rigandum caput aut stomachum supponere vix audebant) ægros nunc jubent obbibere. Non si extrinsecus affusæ aliquid aliquando tulere auxilii, intus sumuntur impunè: nec ut id sit audaculis persuasum, est & sapientioribus. Equidem laborantibus utero puel-
lis, fortisque suæ pertæsis, ad eas fictis causis, rusticationis-
que potius, quàm potandi causâ proficisci non inutile est. Et qui eò se morbo senescente contulerint, quidni naturæ ut & illius, sic & aquarum victricis robore, inde incolumi capite redeant? iisdem qui se seriò proluerint senes ac pueri, suæ mox temeritatis culpam luent spiritu. Cadent & in turba reliqui, vel ad dies forsân aliquot relevati, successu gaudioque falso videbuntur exultare: at erit in eorum venis atque visceribus inclusâ cæco cum igne perniciēs, suo tempore furenter eruptura; aut in hoc ingrata miseris ducenda erit vita, novis ut usque suppetant morbis atque doloribus, unde penitùs se se nunquam evolvant.

V.

NISI stolido more pluri fiunt quæ pluri emuntur, nobisque sordent naturæ in omnibus quæ profunt facilis munera, cum se dat expediendum corpus, frangendusque calor alienus, quâvis metallicâ valere iussâ, præsto, ac vel ante pedes est simplex dulcisque aqua, cursu præcipuè exercita, quæ ventriculo primùm jucunda, spiritu defecto-
rum vires animùmque revocat, famem, sensus, mentem-
que acuit; suo frigore quidquid acre autamarum est, castigat, bilem obtundit, ignem stimque abolet, aggestos ubi-
vis humores sua tenuitate diluit & eluit: tum quacunque

viam secans intimos viscerum recessus pervadit, si quas in angustias impegerit, eas molliendo demoverit, iturisperve-
nas purgantibus medicamentis iter adornat, euntium vires
deportat, morbos nunc avertit, nunc funditus tollit, nec
ullâ interim alienâ qualitate corpus imbuat, quin tenuatum
recreat, restituit, utque floreat, vigeat, & adsueta vicem
præstet fortius, efficit. Tam latè patet ejus munificentia,
ut omnium terræ virium, omnium terrâ nascentium causa
sit: & veluti quam deseruit humor, sterilis est ac nuda, ita
quæ sive cœli indulgentiâ ruptoque imbre, sive aliquo
resperâ fonte dulci est uligine læta majores alat herbas,
alat & arbores, quæ in cœlum exeunt, frondes, ramosque
latius explicant, flore & fructu copiosiori se induunt. Quid?
quod herbosorum annuum ripæ viridissimo gramine se se
vestiant, hocque etiam per pastarum animantium ubera fun-
dant lactis sinus, flumina, nonne & simplicis aquæ bene-
ficij est?

*Ergo calidiori impeditoque corpori non metallica, sed
simplex aqua.*

DOMINI DOCTORES DISPUTATURI

M. Carolus de Laval.	M. Ioannes Baptista de Re-	M. Hermanus de Launay.
M. Dionysius Dodart.	velois, Pharmacia Professor.	M. Philippus Harduin de
M. Dionysius Pailon,	M. Edmundus Chavier.	S. Jacques.
Academia Censor.	M. Raphaël Maurin.	M. Claudius Quiquebenf.

Proponebat Lutetiæ NICOLAUS DE JOUVANCI,
Parisiinus, A.R.S.H. MDCLXXIV.

P A R I S I I S,
Ex Typographiâ FRANCISCI MUGUET, Regis ac Illust.
Archiepiscopi Typographi.